

遼

史

拾

遺

補

遼史拾遺補卷四

震澤楊復古列歐輯

志第二營衛志中

四時各有行在之所謂之捺鉢

文昌雜錄曰北人謂住坐處曰捺鉢四時皆然如春捺鉢之類是也不曉其義近者彼國中書舍人王師儒來修祭奠余充接伴使因以問師儒答曰是契丹家語猶言行在也

志第四兵衛志上

兵制

方勺泊宅編曰富韓公云契丹正強盛奚霫渤海党項高麗女真新羅黑水韃靼回鶻元昊凡十國皆役服之貢奉不絕惟與中原爲敵國兵馬略集便有百萬多作大舟安四輪陸行以載輜重遇塘水黃河則脫輪以度人馬亦欲自滄洲東泛海而來爲牽制犄角之勢○李冶敬齋古今註曰武珪燕北雜記云契丹行軍不擇日用艾和馬糞於白羊琵琶骨上灸破便出軍不破卽不出李子云灸琵琶骨不獨契丹凡蠻貊皆爲之番禺記載嶺表占卜甚多有骨卜田螺卜雞卵卜牛卜鼠米卜箸卜篋卜乃知四夷尚鬼遇

物皆得以爲卜也今北方灸琵琶骨者與珪記特異
所灸之法蓋有可入不可入者疾病飲食一動一止
悉有條理珪則專謂灸破便出軍不破卽不出蓋當
時所見適然自以爲說耳

志第七地理志一

上京臨潢府○潢河○天雄寺

續補

元好問續夷堅志曰上京臨潢府在中都北三千里
夏至晝六十刻夜三十六刻○齊召南水道提綱曰
大遼水卽潢水古稱饒樂水濫真水托紇臣水吐護
真水皆卽此河今蒙古稱曰西喇木倫猶漢言黃河

也○契丹國志曰渤海旣平乃製契丹文字三千餘言因於所居大部落置寺名曰天雄寺今寺內有契丹太祖遺像

周廣順中胡嶠記

胡嶠陷北記曰自幽州西北入居庸關明日又西北入石門關關路崖狹一夫可以當百此中國控扼契丹之險也又三日至可汗州南望五臺山其一峯最高者東臺也又三日至新武州西北行五十里有雞鳴山云唐太宗北伐聞雞鳴於此因以名山明日入永定關此唐故關也又四日至歸化州又三日登天

嶺嶺東西連互有路北下四顧冥然黃雲白草不可窮極契丹謂嶠曰此辭鄉嶺也可一南望而爲永訣同行者皆慟哭往往絕而復蘇又行三四日至黑榆林時七月寒如深冬又明日入斜谷谷長五十里高岸峻谷仰不見日而寒尤甚已出谷得平地氣稍溫又行二日渡湟水又明日渡黑水

祖州天成軍上節度

契丹國志富鄭公行程錄曰自中京正北八十里至臨都館又四十里至官窰館又七十里至松山館又七十里至崇信館又九十里至廣寧館又五十里至

姚家塞館又五十里至咸寧館又三十里度潢水石
橋旁有饒州蓋唐朝嘗於契丹置饒樂州也今渤海
人居之又五十里至保和館度黑河七十里至宣化
館又五十里長泰館西二十里許有佛寺民社云卽
祖州亦有祖山山中有阿保機廟又四十里至上京
臨潢府自過崇信館卽契丹舊境蓋其南皆奚地也
又西門曰金德內有臨潢館子城東門曰順陽入門
北行至景福門又至承天門內有昭德宣政二殿皆
東向其甍廬亦皆東向臨潢西北二百餘里號涼淀
在漫頭山南避暑之處多豐草掘丈餘卽堅冰云

復吉案拾遺於祖州下采取行程錄未全今備錄
於此

慶州玄寧軍上節度○跳兔

拾遺補

王寂拙軒集曰慶州北山之麓遶山陵在焉俗謂之
三殿二十年前常爲盜發所得不貲是所謂厚葬以
致寇者歎而成詩珠襦適足賈身禍金盃傳聞落世
間慙愧漢文遺治命瓦棺深葬霸陵山○王士點禁
扁曰金殿慶州聖宗神御大安望仙山殿同天四殿並在慶州○劉仲
達鴻書曰今契丹及交河北境有跳兔爪足似鼠長
尾端有毛亦曰紅毛兔

福州○衛州 續補

陷北記曰又東行數日過衛州有居人三千餘家蓋契丹所虜中國衛州人築城而居之

志第八地理志二

東京遼陽府○王樂德 附

元好問遺山集王黃華墓碑曰王樂德居渤海遼太祖平渤海封其子爲東丹王都遼陽樂德之曾孫繼遠仕爲翰林學士因遷家遼陽繼遠孫 使咸飭避大延琳之難遷漁陽咸飭孫六宅使恩州刺史叔寧遷白霄六宅生永壽居韓州遼天慶中遷蓋州之

熊岳縣

志第九地理志三

興中府○三塔

續補

水道提綱曰興中城俗曰古爾板蘇巴漢城遼金時
三塔猶存○紀昀姑妄聽之曰三座塔蒙古名古爾
板蘇巴爾漢唐之營州柳城縣遼之興中府也今爲
喀喇沁右翼地

營丘縣

趙一清水經注釋曰營丘城在營州南慕容廆以宥
州流入置營丘郡契丹重熙初析霸城置營丘縣蓋

遼史拾遺補

卷四

五
折紆堂杉刊

因故郡爲名也

安德州化平軍下刺史○靈巖寺

續補

潛研堂金石文跋尾曰右安德州勅建靈巖寺碑朝請大夫守殿中少監知安德州軍州事耶律劭撰文沙門恆劬正書碑陰記則恆劬撰文而劭篆書今在興中故城東南七十里柏山之顛字畫完好小篆尤工不減夢瑛黨懷英也

川州長寧軍中節度○佛頂尊勝陀羅尼石幢

續補

潛研堂金石文跋尾曰興中故城東北六十七里有古城址周不及三里遼白川州地也城中有遼石幢

記首云奉爲神贊天輔皇帝齊天彰德皇后萬歲親王公主千秋文武百僚恆居祿位風調雨順海晏河清一切有情同霑利口按聖宗加上尊號凡六曰昭聖者乾亨四年也曰天輔者統和元年也曰至德廣孝昭聖天輔者五年及二十四年也曰宏文宣武尊道至德崇仁廣孝聰睿昭聖神贊天輔者開泰元年也曰睿文英武遵道至德崇仁廣孝功成治定昭聖神贊天輔者太平元年也此云神贊天輔皇帝則石幢之立當在開泰以後矣遼史仁德皇后傳統和十九年冊爲齊天皇后本紀亦同自後別無加上尊號

之事史文闕略當據此以補之但不知在何年耳其云親王者大丞相晉國王耶律隆運也記文爲長寧軍節度掌書記儒林郎試大理評事武騎尉王桂撰後有長寧軍節度管內觀察處置等使金紫崇祿大夫檢校太傅使持節白川州諸軍事白川州刺史兼御史大夫上柱國丁巳下俱闕疑書石人名也遼史地理志川州明王安端置會同三年詔爲白川州安端子察割以大逆誅沒入省曰川州不云省於何年金史則云大祿五年去白字今此幢立於聖宗時猶稱白川州可見金史攷之未審也左方列銜可辨識

者有銀青崇祿大夫兼監察御史武騎尉商稅麴務
都監王元泰銀青崇祿大夫兼監察御史武騎尉同
監麴務張翼三司押衙麴務判官兼知商稅事翟可
行銀青崇祿大夫檢校工部尚書兼御史大夫上柱
國崔展儒林郎試大理評事守白川州咸康縣令武
騎尉王口銀青崇祿大夫檢校左散騎常侍兼殿中
侍御史驍騎尉江濤觀察判官儒林郎試大理司直
雲騎尉賜緋魚袋田能成管內觀察處置等使金紫
崇祿大夫檢校太傅使持節白川州諸軍事白川州
刺史兼御史大夫上柱國鉅鹿縣開國子食邑五百

戶耿延口諸人於史無所表見惟聖宗紀有昭德軍
節度使耿延毅其爲一人與否惜石文斷裂無從知
之矣遼史志百官於南面尤略此所載結銜有散官
有檢校官有憲官有試秩有勳有爵有賜有食邑皆
史所未詳至商稅麴務都監同監麴務及麴務判官
之設百官食貨兩志俱遺之所宜特書以補正史之
闕漏也

志第十地理志四

南京析津府○梳妝樓

拾遺補

高粱河

拾遺補

燕角樓

續補

尉使君寺

續補

慈悲菴

續補

報國寺

續補

竹林寺

續補

蕭太后運糧河

續補

湯泉

續補

螞蟻墳

續補

義井

續補

永平館

續補

楊士奇郊遊記曰降而觀於浮圖之址問僧此寺所
創始不能言也僧指其南廢丘隆然而峙曰此遼之
蕭太后妝臺也○西河詩話曰遼后梳妝臺址在太
液池東小山上一名瓊花島卽今白塔寺址是也○
孫承澤春明夢餘錄曰高粱河水經出白并州黃河
之別源東逕昌平境沙澗又東南經高粱店流入都
城海子宋太宗伐遼與遼將耶律沙等戰於高粱河
卽此○朱彝尊曰下舊聞曰燕角樓在府西南十五

里遼建今其地猶名燕角

欽定日下舊聞攷按遼燕角樓今無攷惟土地廟之西其地猶有燕角兒之名閣讀如橐更攷明張爵五城坊巷衙衙集於白紙坊亦載有燕角兒正在廣寧門右安門內西南角是明一統志所載正指其地況遼時城址其半在今外城之西則今燕角之地適當其東遼時樓址或卽在是○尉使君寺北魏元象元年幽州刺史尉長命造

欽定日下舊聞攷按元一統志遼保寧中建殿九間窮極偉麗○慈悲庵北院內有遼壽昌五年慈智大德

師佛頂尊勝大慈陀羅尼幢并記 慈仁寺亦呼報
國寺蓋先有報國寺在寺之西北隅今僧院中尚有
遼乾統三年尊勝陀羅尼石幢

欽定日下舊聞攷按今報國寺西北隅有寺無額土人
呼爲小報國寺遼幢無攷 竹林寺遼道宗八年楚
國大長公主捨私第爲寺賜額竹林寺僧曰一塔無
影 眞常觀南五六里爲蕭太后運糧河今泯滅不
可攷問矣 湯泉在百望山西北六十里有涇曰十
八盤山有湯泉云是遼后浴處○劉侗帝京景物略
曰海子西北隅清明日蟻億萬集疊而成丘中一丘

高丈旁三四丘高各數尺竟日而散去今土人每清明節往羣觀之曰螞蟻墳傳是遼將伐金全軍沒此骨不歸矣魂無主者故化爲沙蟲感於節序其有焉
○吳長元宸垣識略曰大覺寺遼築義井精舍於開陽門之郭傍有古井清涼滑甘因以名焉 永平館一名碣石館遼時朝士宴集之所

○宛平縣○香山寺 拾遺補 平遼碑 續補

日下舊聞曰香山寺遼中丞阿里吉所捨殿前二碑載捨宅始末碑石光潤如玉白質紫章寺僧曰爲鷹爪石○春明夢餘錄曰平遼碑立燕都豐宜門外史

臣韓昉撰文宇文虛中書舊有詩云十丈豐碑勢倚
空風雲猶憶下遼東百年功業秦皇帝一代文章太
史公石斷雲鱗秋雨後苔封鼇背夕陽中行人立馬
空惆悵禾黍離離滿故宮韓昉燕京人

○昌平縣○燕窩石

續補

汪啟淑水曹清暇錄曰燕窩石在昌平州形類盆其
一刻燕窩二字畿輔古蹟志云遼時遺物也至今尚
存

○新城縣

許亢宗奉使行程錄曰離雄州三十里至白溝巨馬

河過河三十里到新城縣契丹阿保機入寇唐莊宗以鐵騎五千敗之於新城卽此地舊爲契丹邊面自與宋朝結好百餘年樓壁僅存○沈括夢溪筆談曰瓦橋北與遼人爲鄰素無關河爲阻何承矩守瓦橋始議因陂澤之地瀦水爲塞欲自相視日會僚佐汎船置酒賞蓼花作蓼花吟數十篇令客屬和畫圖傳至京師人莫喻其意自此始壅諸淀○蔣一葵長安客話曰霸在宋世蓋與遼分界處州北一里有界河相傳楊延朗建草橋於此關因以名

易州高陽軍上刺史○興國寺

續補

潛研堂金石文跋尾曰右易州興國寺太子誕聖邑碑沙門方偁撰文范陽逸士張雲書太子誕聖邑者千人邑之名以四月八日誦經禮佛而名之也遼史禮志二月八日爲悉達太子生辰京府及諸州雕木爲像儀仗百戲導從循城爲樂葉隆禮契丹國志本作四月八日此碑亦以四月八日爲誕聖之辰則禮志所稱誤矣然金史海陵記有禁二月八日迎佛之文知當時固有以二月爲佛生辰者非後人轉寫之誤也碑末列銜者都維那右監門大將軍知易州軍州事兼沿邊巡檢安撫屯田勸農等使耶律遷朝散

大夫尚書左司郎中通判軍州事賜紫金魚袋武騎尉楊舉直朝散大夫尚書比部郎中知易縣事飛騎尉借紫劉琚妻李氏儒林郎試大理司直守司戶參軍借緋靳佑臣承務郎試太子校書郎守司候參軍雲騎尉李師仲承務郎試太子校書郎守易縣主簿兼知縣尉宋公綯將仕郎守國子直講官學黃溫仁儒林郎守太子校書郎雲騎尉知律劉詠軍事判官文林郎試太子校書郎魯去華都孔目官文林郎試太子校書郎武騎尉周師安左都押衙李照右都押衙王文信知客石恩副知張存知衙韓安安撫押司

官楊師言印官韓仁詮前行曹拱溫後行劉世宣州
司呈押田深書表馮詮印官何閏前行孫世卿前行
石惠司候司典曹福本典王恩皆州之官吏也遼史
百官志南面方州官州有刺史縣有令而碑所載知
軍州事通判軍州事知縣事之名史皆失書蓋遼之
官制多雜采唐宋之名志以爲大略采用唐制者猶
未甚核故予特標而出之俾後之言官制者有所攷
焉

平州遼興軍上節度○染莊社

續補

宋琬永平府志染莊社記曰契丹時遼興軍風爇者

行貨路收一卵於篋歸置錦囊繫臍下月餘出蛇如
簪飼之以肉每出便飼漸長盈丈圍將尺許堯雖傾
篋居之而力不能任矣乃縱於野任其自食嘗命以
名曰雅撫首似不能忍別雅知人戀戀然但不能言
而去數歲益大始食野禽繼而噬人有司制之無策
聞於契丹榜募能捕者堯知其必雅乃應募而抵放
處呼其名而至敘故舊而數其罪蛇遂俛首伏誅其
血流及近村土石悉染紅而莊以名莊老以堯能施
恩除害而祀之雅能知恩服罪而配焉是歲里人修
祠落成紀其歲月金至寧元年仲秋辛卯興平路猛

安蒲察孟里記○周春曰余輯遼詩話徧閱十六州志乘無足采者卽遼時事迹寥寥惟永平府志所載染莊社記最爲奇異堪入齊諧之志幾同海棗之談因作絕句詠之曰國士酬知己由來未足誇報恩拚一死不見染莊蛇按遼興軍平州卽今永平府之地風炎姓名甚奇雖大昊苗裔而堪入夏氏奇姓通也風疑卽風古風字炎疑卽光字之譌

○安喜縣○灤州永安軍中刺史

高十奇松亭行記曰遷安縣本漢之令支縣遼於令支故城置安喜縣金大定間始易今名○王應麟困

學紀聞曰唐無灤州武經總要易定帥王都驅其民入契丹因以烏灤河爲名以居之

志第十一地理志五

○弘州順聖縣○魏延恕

附

姚燧牧庵集金甌官署令魏府君墓碣曰魏氏由唐相知古子林剌朔州子孫居桑乾桑乾爲今弘州之順聖遼有延恕者生中奉大夫守成中奉生通奉大夫餘慶

豐州天德軍節度使○九十九泉

錢良擇出塞紀略曰和碩克山對面爲諸勒克山山

巔有九十九泉匯爲長河直達歸化城按魏書天賜二年登武要北源觀九十九泉武要定襄郡屬縣在大同西北宋白云九十九泉在幽州西北千餘里遼志亦載鹽灤九十九泉意卽是此處也

奉聖州武定軍上節度○上花園下花園

拾遺補

○火

神淀

續補

遼詩話曰明崑山葉盛記上花園云雞鳴山西三十里爲上花園又三十里爲鎮城上花園相望有下花園竝遼蕭太后種花之所遺址尚存涿人頓銳

正德辛未

進士官終長史

詩嶺雲沈日暝煙斜見說窮邊亦有花應是

漢宮青冢怨不甘玉貌委泥沙○夏之璜出塞日記
曰道經下花園爲遼后蕭氏遊幸之地○宋白續通
典曰火神淀在新州西

應州彰國軍上節度唐武德中置金城縣後改應州○
木塔續補

田緯匈奴須知曰應州東至幽州八百五十里金城
縣東北至朔州九百里○宋犖筠廊偶筆曰應州木
塔甚奇馮訥生主政雲驤有登塔詩一帙序略曰塔
建自遼疊木爲之七級八面高見數十里

朔州順義軍下節度○造經樓續補

夏之璜塞外橐中集曰新高山城對岸山有寺踞其
巔一塔淩虛巖巒特異其寺云是遼后所建猶有遺
迹存焉作造經樓詩山巔一塔俯溪流殿閣遙疑小
十洲是否當年蕭后建紅酥猶膩造經樓

志第一百五官志一

遼國官制

契丹國志曰賤他姓貴耶律蕭氏二姓其官有契丹
樞密院及行宮都總管司謂之北面以其在牙帳之
北以主蕃事又有漢人樞密院中書省行營都總管
司謂之南面以其在牙帳之南以主漢事其惕隱宗

正寺也夷離畢參知政事也林牙翰林學士也夷離
中刺史也內外官多做中國者其下佐史則有敝史
木古思奴古都奴古徒奴古分領兵馬則有統軍侍
衛控鶴司南王北王奚王府五帳分提失哥東西都
省太師兵又有國舅鈐轄遙輦常袞諸司南北皮室
二十部族節度頻必里九克漢人渤海女真五節度
五治太師一百六百九百家奚鑄金魚符調發兵
馬其捉馬及傳命有銀牌二百軍所舍有遠探關子
馬以夜聽人馬之聲每其主立聚所得人戶馬牛金
帛及其下所獻生口或犯罪沒入者別爲行營領之

建州縣置官屬

志第十六百官志二

北面邊防官

契丹國志曰沙漠府控制沙漠之北置西路都招討府與隗部族衛臚胸河統軍司倒撻嶺衙鎮撫達靺蒙骨迪烈諸軍

志第二十禮志四

賓儀

契丹國志曰高昌國龜茲國于闐國大食國小食國甘州沙州涼州已上諸國三年一次遣使約四百餘

人至契丹貢獻玉珠犀乳香琥珀礪砂瑪瑙器寶鐵
兵器斜合黑皮褐黑絲門得絲怕里呵褐里絲已上
皆細毛織成以二丈爲匹契丹回賜至少亦不下四
十萬貫○泊宅編曰歲賜大遼銀三十萬兩絹三十
萬匹正旦衣著四千匹銀器二千兩生辰衣著五千
匹銀器五千兩 神宗嘗曰遼曾貢袞冕一襲其繪
星辰在背疑有所傳

志第二十二禮志六

歲時雜儀

契丹國志曰歲十月五京進紙造小衣甲并槍刀器

械各一萬副十五日一時堆垛國主與押番臣僚望木葉山奠酒拜用番字書狀一紙同焚燒奏木葉山神云寄庫

復古案葉志此條與遼史不同存以備攷

皇后生產儀

續補

王易燕北錄曰皇后生產如過八月先啟建無量壽道場逐日行香禮拜一月與戎主各帳寢預先造團白氈帳四十九座又內一座最大徑圍七十二尺皇后欲覺產時於道場內先燒香望日番拜八拜便入最大者帳內其四十八座小帳於大帳周圍卓放每

帳各用有角羊一口以一人紐羊角候皇后欲產時諸小帳內諸人等一時用刀紐羊角其聲俱發內外人語不辨番云此羊代皇后忍痛之聲也仍以契丹翰林院使抹卻眼扼皇后胃穩婆是燕京高夫人其皇后用甘草苗代稗草臥之若生男時方產了我主著紅衣服於前帳內動番樂與近上契丹臣僚飲酒皇后卽服酥調杏油半盞如生女時戎主著皁衣動漢樂與近上漢兒臣僚飲酒皇后卽服黑豆湯調鹽三錢其羊差人收放不得宰殺直至自斃皇后至第九日卽歸戎主帳

志第二十五儀衛志二

常服

洪皓續松漠紀聞曰北方苦寒故多衣皮雖得一鼠亦褫皮藏之婦人以羔皮帽爲飾至直十數千敵三大羊之價不貴貂鼠以其見日及火則剝落無色也

志第二十六儀衛志三

傳國寶

拾遺補

陳頤負喧野錄云頤嘗聞諸老先生議論謂自昔陋儒謂秦璽所在爲正統故契丹自謂得傳國璽欲以歸太祖皇帝太祖不受曰吾無秦璽不害爲國且亡

國之餘何足貴乎契丹畏服

符契○銀牌

燕北錄曰銀牌有三道上戎主下及契丹臣庶每年
取初降雪時帶用

經籍志

拾遺補

經部小學類

李德明番書十二卷

史部正史類

蕭韓家奴五代史譯解

重熙十五年奉詔譯

編年類

蕭韓家奴通歷譯

起居注類

耶律良興宗起居注

重熙中修

雜史類

馬得臣唐三紀行事

聖宗時錄唐高祖太宗玄宗三紀行事可法者以進

蕭韓家奴貞觀政要譯

子部醫家類

耶律庶成方脈書譯

集部別集類

耶律庶成集

耶律谷欲集

王棠集

耶律氏常哥集

策論類

蕭韓家奴策對一卷

碑類

蕭韓家奴太宗功德碑

出金門詔補三史藝文志

表第一世表

契丹先世

契丹國志曰後有一主號曰迺呵此主特一髑髏在
穹廬中覆之以氈人不得見國有大事則殺白馬灰
牛以祭始變人形出視事已卽入穹廬復爲髑髏因
國人竊視之失其所在復有一主號曰喎呵戴野豬
頭披野豬皮居穹廬中有事則出退復隱入穹廬如
故後因其妻竊其豬皮遂失其夫莫知所如次復有
一主號曰晝里昏呵惟養羊二十口日食十九畱其
一焉次日復有二十口日如之是三主者皆有能治
國之名餘無足稱焉異矣哉氈中枯骨化形治事戴
豬服豕罔測所終當其隱入穹廬之時不知其孰爲

之主也孰爲之副貳也荒唐怪誕譌以傳譌遂爲口實其詳亦不可得而詰也

迭剌部耶律阿保機建鼓旗自爲一部不肯受代自號爲王盡有契丹國

楊鉅翰林學士院舊規曰答契丹書頭云敕契丹王阿保機尾云想宜知悉時候卿比平安好舊使黃麻紙平使印自爲朝宣令使五色箋紙并使印及次寶鈿函封自僭稱神號奏事多繫軍機所賜中書內改例從權院中無樣○北廷雜記曰凡立王則衆部酋長皆集會議某有德行功業者立之或災害不生

羣牧孳盛人民安堵則王更不替代苟不然其諸酋
會衆部別選一名爲王故王以番法亦甘心退焉不
爲衆所害 有韓知古韓穎康枚王奏事王郁皆中
國人共勸太祖不受代

表第二皇子表

景宗四子隆慶字燕隱小字普賢奴第二

東都事略曰初燕燕死隆緒闇弱而隆慶桀黠國人
多附之又繕甲兵遣親信以私書交結貴臣隆緒常
召之辭以避暑不至其親信錄其書抵雄州且言隆
緒不能敦睦親族國人皆思歸漢真宗敕邊吏不報

表第八屬國表

渤海

契丹國志曰先是渤海國王大諲譔本與奚契丹爲
脣齒國太祖初興并吞八部繼而用師并吞奚國大
諲譔深憚之陰與新羅諸國結援太祖知之集議未
決後因遊獵彌旬不止有黃龍在其氈屋上連發二
矢殪之龍墜其前後太子德光於其地建州黃龍府
卽其地也太祖曰吾欲伐渤海國衆計未決而龍見
吾前吾能殺之是滅渤海之勝兆也遂平其國虜其
王○宋元通鑑曰太平興國六年秋七月遣使如渤

海渤海本高麗之別種契丹嘗取其扶餘城爲東丹府帝將大舉伐契丹遣使賜其王詔書令發兵以應約滅遼之日幽薊土宇復歸中朝朔漠之外悉與渤海竟無至者○松漠紀聞曰古肅慎城四面約五里餘遺堞尚在在渤海國都三十里亦以石累城腳

天祚之亂其聚族立姓大者於舊國爲王金人計之軍未至其貴族高氏棄家來降言其虛實城後陷契丹所遷民益繁至五千餘戶勝兵可三萬金人慮其難制頻年轉戍山東每徙不過數百家至辛酉歲盡驅以行其人大怨富室安居踰二百年往往爲園池

植牡丹多至二三百本有數十幹叢生者皆燕地所無纔以十數千或五千賤買而去其居故地者令歸契丹舊爲東京置畱守有蘇扶等州蘇與中國登州青州相直每大風順隱隱聞雞犬聲

吐渾

續通典曰吐谷渾謂之退渾蓋語急而然聖歷中吐蕃陷安樂州其衆東徙散在朔方○五代會要曰吐谷渾其畜牧就善水草丁壯常數千人羊馬生息入市中土朝廷嘗存恤之晉天福六年大首領白承福及麾下來朝九月又遣首領白可久來朝少主嗣位

絕契丹之好數召其酋長入朝厚加錫賜每大讌會
皆命列坐於勳臣之次至開運捍虜於澶州召承福
等帥其部衆從行屬歲多暑熱部下多死復遣歸太
原移帳於嵐石州然承福馭下無法多干軍令其族
白可久在承福之亞因牧馬帥本帳北遁契丹授以
官爵復遣潛誘承福承福亦思叛去事未果漢祖知
之乃以兵環其部族擒承福與其族白鐵匱赫連海
龍等五家凡四百餘人伏誅籍其牛馬命別部長王
義宗統其餘屬

女直國

宋元通鑑曰太祖建隆二年女真以馬入貢詔蠲登州沙門島居民租賦令專治舟船渡其所貢馬三年四年復遣貢馬乾德二年開寶二年三年俱貢馬太宗太平興國六年女真遣使來貢帝欲伐契丹乃以詔賜定安國王令張犄角之勢定安本馬韓之種也其王烏玄明亦怨契丹侵侮不已欲依中國以攄宿憤得詔大喜因女真遣使朝貢道出定安附表來上帝優詔答之付女真使者令齎以賜焉淳化二年首領野里雞等上言契丹怒其朝貢中國置三柵於海岸每柵置兵三千絕其貢獻之路乞發兵共平三柵

太宗但降詔撫諭而不爲發兵大中祥符三年契丹
征高麗道由女真女真復與高麗合兵拒之天禧三
年復遣使至自天聖後沒屬契丹不復入貢至烏古
迺能役屬諸部會遼主國蒲聶部節度使拔乙門叛
遼遼將致討烏古迺恐遼兵深入得其山川險易或
將圖之乃告遼曰彼可計取也若用兵必將走險非
歲月可平也遼從之烏古迺因襲而擒之以獻遼主
召視燕賜加等授生女直部節度使始有官屬綱紀
漸立然不肯受印繫遼籍其部內舊無鐵鄰國有以
甲冑往鬻者必厚價售之得鐵旣多因以修弓矢備

器械兵勢稍振前後願附者衆熙寧七年五國沒撚
部謝野勃堇復叛遼烏古迺伐之謝野敗走烏古迺
將見遼邊將自陳敗謝野之功行次來流水疾作而
死子劾里鉢嗣哲宗元祐七年劾里鉢卒母弟頗刺
淑襲爲節度使頗刺淑機敏善辨尤能知遼人國政
民情每白事於遼聽者皆信服不疑○猗覺寮雜記
曰予在史館讀眞宗實錄雄州言契丹移遼陽城言
征高麗且涉女眞之境女眞衆雖少契丹必不能勝
仍畫圖以獻契丹以西樓爲上京遼陽爲東京在中
京正東稍南

復吉案在字上
常有東京二字

又云契丹習俗旣葬必

守墳或云國主欲守其母墳聲言征高麗駐遼陽城也上謂王且等曰契丹征高麗萬一高麗窮蹙或歸於我或來乞師何以處之且曰當顧其大者契丹方固盟好高麗貢奉累歲不至上曰然可諭登州侍其旭如高麗有使來乞師卽語以累年貢奉不入不敢達於朝廷如有歸投者第存撫之亦不須以聞宣和間女真遣使海上結約夾攻大遼遂起燕山之役是時未聞有一人以此事告於上者○汪若海麟書曰射鹿以聲自註曰女真善射能爲鹿鳴呼羣鹿而射之

韃靼

拾遺補

江休復嘉祐雜志曰遼使云韃靼界上獵圍中獲一
野人披鹿皮走及奔鹿

遼境四至

拾遺補

契丹國志曰正西與西夏黃河爲界西南至麟州府
州界又次南近西定州北平山爲界又南至霸州城
北界河又次南至遂城北鮑河爲界又南近東至滄
州北海又南至安肅軍白澗河爲界又南近東至登
州北海又南至雄州北拒馬河爲界又南至海○陷
北記曰距契丹國東至於海有鐵甸其族野居皮帳

而人剛勇其地少草木水鹹濁色如血澄之久而後可飲 又北牛蹠突厥人身牛足其地尤寒水曰瓠
瓠河夏秋冰厚二尺春冬冰徹底常燒器銷冰乃得
飲東北至襍劫子其人髦首披布爲衣不鞍而騎大
弓長箭尤善射遇人輒殺而生食其肉契丹等國皆
畏之契丹五騎遇一襍劫子則皆散走 又北狗國
人身狗首長毛不衣手搏猛獸語爲犬嗥其妻皆人
能漢語生男爲狗生女爲人自相婚嫁穴居食生而
妻女人食云嘗有中國人至其國其妻憐之使逃歸
與箸十餘隻教其每走十餘里遺一箸狗夫追之見

其家物必銜而歸則不能追矣其說如此 契丹嘗
選百里馬二十四遣十人齎乾麩北行窮其所見其
人自黑車子歷牛驪國以北行一年經四十三城居
人多以木皮爲屋其語言無譯者不知國地山川部
族名號其地氣遇平地則溫和山林則寒冽至三十
三城得一人能鐵甸語其言頗可解云地名頡利烏
于耶堰云自此以北龍蛇猛獸魑魅羣行不可往矣
其人乃還此北荒之極也契丹謂嶠曰契丹之人豈
能勝中國然晉之所以敗者主暗而臣不忠因具道
諸國事曰子歸悉以語漢人使漢人努力事其主無

爲夷狄所虜吾國非人境也

遼史拾遺補

卷四

三

新編

遼史拾遺補卷四終

遼史拾遺補卷五

震澤楊復吉列歐輯

列傳第一后妃

太祖淳欽皇后述律氏

契丹國志曰太祖崩於扶餘城述律后召諸酋長妻
謂曰我今寡居汝何不效我乃集其夫至問曰汝思
先帝乎曰受先帝恩豈得不思后曰果思之宜往見
之遂殺之 后有母有姑皆踞榻受其拜曰吾惟拜
天不拜人也 太宗與晉帝構怨帝用兵連年中國
疲敝契丹人畜亦多死國人厭苦之太后謂太宗曰

使漢人爲遼主可乎曰不可太后曰然則汝何故欲爲漢主曰石氏負恩不可容太后曰汝今雖得漢地不能居也萬一蹉跌悔何所及又曰漢兒何得一眠自古但聞漢和番不聞番和漢漢兒果能回意我亦何惜與和

太宗靖安皇后蕭氏

契丹國志曰太宗皇后蕭氏涿州人遼興軍節度使蕭延思之女也太宗崩於欒城后時在國後崩與帝合葬暨穆宗卽位立陵寢廟建碑頌德

世宗妃甄氏

契丹國志曰世宗后甄氏漢地人世宗從太宗南入大梁得之宮中時后年四十一歲世宗幸之生六子長曰明記後卽位爲景宗次曰平王荆王吳王寧王河間王

景宗睿智皇后蕭氏

契丹國志曰后次女曰長壽奴適后姪東京畱守悖野次曰延壽奴適悖野母弟肯頭延壽奴出獵爲鹿所觸死后卽縊殺肯頭以殉葬 后次姊適趙王王死趙妃因會飲毒后爲婢所發后酖殺之后天性忤忍陰毒嗜殺神機智略善馭左右大臣多得其死力

統和年間舉國南征后親跨馬行陣與幼帝提兵初趨威虜軍順安軍東趨保州又與幼帝及統軍順國王撻覽合勢以次定州餘衆直抵深祁以東又從陽城淀緣胡盧河踰關南抵瀛州城下兵勢甚盛后與幼帝親鼓衆急擊矢集城上如雨復自瀛州抵貝冀天雄南宋惶遽駕親幸澶淵后爲謀主至遣王繼忠通好及所得歲幣亦后之謀也國中所管幽州漢兵謂之神武控鶴羽林驍武等皆后自統之其將有南北皮室當直舍利等是時聖宗年少宋使臣曹利用張皓之議和皆后與幼帝引至帳前問勞館設左飛

龍使韓杞至宋朝先授幼帝書再升殿跪奏曰太后令臣上問皇帝起居此可以知太后專其政人不畏其幼帝也

聖宗仁德皇后蕭氏

契丹國志曰齊天后有子皆不育元妃生子長卽今帝也次日達姐李又生楚國公主燕國公主承天太后以楚國公主嫁其弟蕭姑從撒爲築城以居之曰睦州號長慶軍徙戶一萬實之曰從嫁戶

聖宗欽哀皇后蕭氏

契丹國志曰后殘忍陰毒居喪未及一年先朝所行

法度變更殆盡不俟聖宗服闋加尊號曰法天皇太后
后駙馬蕭懇特一子正梯自景宗朝承天太后襁育
之逮至成人聖宗恩視比之皇子尚韓國公主後平
渤海勲業隆重封蘭陵王后兄弟媚而殺之連坐如
木拙里太師觀音太師彌勒太師等十餘人一皆功
臣駢首誅夷內外歎憤犯賊等人累朝切齒雖赦宥
竝不敘用山陵未畢后已洗滌用之一一擢諸清途
毛克和等四十人后家奴隸咸無勞績皆授防團節
度使至于出入宮掖詆慢朝臣賣官鬻爵殘毒蕃漢
自是幽燕無行之徒願沒身爲奴者衆矣淫虐肆行

刑政弛紊弟兄聚議各弄大權朝臣朋黨每事必知
太后臨朝凡四年興宗方幽而廢之契丹已困矣太
后之廢也諸舅滿朝權勢灼奕帝懼內難乃與殿前
都點檢耶律喜孫護衛太保耶律劉三等謀廢后召
硬塞拽刺護衛等凡五百餘人帝立馬於行宮東之
二里小山上喜孫等直入太后宮驅后登黃布車幽
於慶州諸舅以次分兵捕獲或死或徙餘黨竝誅其
不便軍民三十餘事竝立改之

興宗仁懿皇后蕭氏

契丹國志曰帝酷好沙門縱情無檢后每伺帝有所

失隨卽匡諫多所弘益

道宗宣懿皇后蕭氏

契丹國志曰后生有神光之異後入宮爲芳儀進位昭儀道宗登位后正位中宮性情恬淡寡欲魯王宗元之亂道宗與同射獵內外震恐未知音耗后勒兵鎮帖中外甚有聲稱後崩葬祖州 王士禎居易錄曰契丹國志后妃傳道宗蕭皇后本傳云云焚椒錄所紀耶律乙辛張孝傑輩讒構賜死之事絕無一字及之又錄稱后爲南院樞密使惠之少女而志曰贈同平章事顯烈之女志言勒兵似嫺武略者而錄言

幼能誦詩笏及經子錄中所載射虎應制諸詩及回
心院詞皆極工而無一語及武事且本紀道宗在位
四十七年改元者三清寧咸雍壽昌初無太康之號
而錄載乙辛密奏太康元年十月據宮婢單登及教
坊朱頂鶴陳首云云已上皆抵牾不合不可解也按
遼史宣懿皇后傳雖略而與焚椒錄所紀同蓋契丹
志之疏耳 姚士麟書焚椒錄後曰鼎作此錄在謫
居鎮州時時乙辛已囚萊州孝傑亦死故敢實錄其
事但天祚時鼎尚在如懿德皇后第二女趙國公主
以匡救天祚竟誅乙辛孝傑剖棺戮屍以家屬分賜

羣臣事竝不補錄一快觀者亦一不了公案

天祚文妃蕭氏

契丹國志曰文妃幼選入宮聰慧閒雅詳重寡言自少時工文墨善歌詩時作歌以諷諫云云其譏切不避權貴如此 趙令時侯鯖錄曰契丹天祚文妃喜文墨嘗作詠史詩以諷諫云云被誅後其子晉王誦經受誅母子俱賢也

天祚元妃蕭氏

東都事略曰延禧兵出漁陽嶺僅復豐應等州又爲女眞所敗其元妃諸王皆被虜再奔夾山 大金國

志曰太子之妻余輦公主乃天祚之女也粘罕之妻蕭氏亦遼主天祚元妃各因間可入勸之南侵

列傳第二宗室

義宗倍

契丹國志曰突欲鎮東丹時乃渤海國亦有宮殿被十二旒冕服皆畫龍象稱制行令凡渤海左右平章事大內相已下百官皆其國自除授 德光旣立突欲愠帥數百騎欲奔唐爲邏者所遏述律后不罪遣歸東丹 明宗長興三年以贊華爲義成節度使選朝士爲僚屬輔之贊華但優游自奉不預政事明宗

嘉之 胡應麟詩藪曰東丹王尤好畫世傳其千角
鹿圖李伯時臨之董北苑有跋宣和畫譜列其目焉
夏文彥圖繪寶鑑補遺曰義宗名倍小字圖欲太
祖長子善畫本國人物 李廌畫品曰古今畫蕃馬
者胡環得其肉東丹得其骨 米芾畫史曰東丹王
胡環番馬見七八本雖好非齋室清玩

章肅皇帝李胡

契丹國志曰少豪俠有智畧善彈工射太祖奇之曰
吾家鐵兒也征渤海時山阪高峻士馬憚勞苦徑於
東谷緣崖而進屢戰有功後渤海平封爲自在太子

燕王洪道

續補

契丹國志曰燕王洪道番名叱地好道宗同母弟也頗有武略庫莫奚侵擾詔洪道討之洪道伏兵林中佯敗而走奚掠輜重洪道與伏兵合擊之盡殪後渤海高顏樂反又命洪道討之終於燕京畱守封燕王復吉按燕王洪道遼史王子表無其人疑卽宋王

和魯幹

梁王信寧

續補

契丹國志曰梁王信寧番名解里北大王烏幹之子始以祇候郎君授林牙雲中奉聖州蔚州節度使同

平章事與帝同謀逐太后出宮拜南大王北大王惕
隱南宰相封梁王加尚父致仕

列傳第三

蕭延思

續補

契丹國志曰蕭延思涿州人太宗皇后父也少習武
藝有材力能左右射自太祖時從平諸番常單騎數
深入敵陣屢戰有功太宗南援石晉時掃古撒按延
又名掃已死矣太宗每歎曰斯人尚在中原不足平
也終北面都部署遼興軍節度使

列傳第五

盧文進

續補

契丹國志曰文進引契丹軍攻新州刺史安金全不能守棄城去周德威援之進攻新州契丹衆數萬德威不勝大敗奔歸文進與契丹攻幽州且二百日城中危困晉王親將兵救之方始解去契丹以文進爲幽州節度使又以爲盧龍節度使 舊五代史曰明宗卽位之明年盧文進自平州率所部十餘萬衆來奔行及幽州先遣使上表曰頃以新州團練使李存矩提衡郡邑掌握恩威虐黎庶則毒甚於豺狼聚賦斂則貪盈於溝壑人不堪命士各離心臣卽拋父母

遼史拾遺補

卷五

八

振綺堂影刊

之邦入朔漠之地幾年雁塞徒向日以傾心一望家
山每銷魂而斷目李子卿之河畔空有怨辭石季倫
之洛中莫陳歸引近聞皇帝陛下皇天眷命清明在
躬握紀乘乾鼎新革故始知大幸有路朝宗便貯歸
心祇伺良會臣十月十日決計殺在城契丹取十一
日離州押七八千車乘領十五萬生靈十四日已達
幽州云泊至洛陽授滑州節度使檢校太尉歲餘移
鎮鄧州累加同平章事入爲上將軍長興中復出鎮
潞州清泰中改安州節度使及晉高祖卽位與契丹
敦好文進以嘗背契丹居不自安天福元年十二月

率其部衆渡淮奔於金陵後卒於江南 南唐書曰
文進少嘗事契丹娶其公主爲其平州刺史 馬令
南唐書曰高越燕人清警有才思文價藹於北土盧
文進有女美而慧善屬文時稱女學士越聞而慕之
往謁文進文進以妻之 玉壺清話曰文進八十二
無病卒卒之日星殞於寢大如杯文進噓赤光丈餘
與星相接

列傳第六

耶律麻荅

遼史作耶律拔里得

續通典曰麻荅本名解里阿保機之從子也其父曰

遼史拾遺補

卷五

九

批點

撒剌歸梁死於汴 資治通鑑曰杜重威自以附契丹負中國內常疑懼遣其子弘璉質於麻荅以求援趙延壽有幽州親兵二千在恆州指揮使張璉將之重威請以守魏麻荅遣其將楊衮將契丹千五百人及幽州兵赴之楊衮至邢州聞麻荅被逐卽日北還麻荅至其國契丹主責以失守麻荅不服曰因朝廷徵漢官致亂耳契丹主鳩殺之

趙延壽

舊五代史曰梁開平初趙德鈞爲偏將獲延壽并其母种氏遂養之爲子 契丹國志曰德鈞旣卒太宗

釋延壽而用之其後會同改元參用番漢以延壽爲
樞密使尋兼政事令 舊五代史曰契丹入寇自恆
州回以羸兵驅牛羊過祁州城下晉刺史沈斌出州
兵以擊之契丹以精騎剗其門邀之州兵陷趙延壽
知其無備與蕃兵急攻之仍呼謂斌曰沈使君吾故
人也擇禍莫若輕早以城降無自辱也斌曰侍中父
子誤計陷於契丹忍以氈幕之衆殘害父母之邦不
自羞慙反有德色沈斌寧爲國家死必不效汝所爲
也翼日城陷斌自剄而死 天福末契丹與少帝絕
好委延壽以圖南之事許以中原帝之延壽乃盜誘

蕃軍蠶食河朔諸軍旣降於中渡契丹主命延壽就塞安撫之 延壽在汴州復娶明宗小女爲繼室先是延州節度使周密爲其子廣娶焉已納財畢親迎有日矣至是延壽奪取之契丹主自汴回至邢州命升延壽坐在契丹左右相之上契丹主死延壽爲永康王兀欲所鎖籍其家財分給諸部尋以延壽入國竟卒於契丹 契丹國志曰太宗嘗指延壽謂晉人曰此汝主也延壽信之由是爲契丹盡力 太宗初許延壽代晉後負約恨之謂人曰吾不入龍沙矣 資治通鑑曰契丹主卒趙延壽恨其負約卽日先引

兵入恆州永康王兀欲及南北二王各以所部兵相繼而入延壽欲拒之恐失大援乃納之時契丹諸將已密議奉兀欲爲主兀欲登鼓角樓受叔兄拜而延壽不之知自稱受契丹皇帝遺詔權知南朝軍國事仍下教布告諸道所以供給兀欲與諸將同兀欲銜之王午延壽下令以來月朔日於待賢館上事受文武官賀其儀宰相樞密使拜於階上節度使以下拜於階下李崧以虜意不同事理難測固請延壽未行此禮乃止間一日兀欲至待賢館受蕃漢官謁賀笑謂張礪等曰燕王果於此禮上吾以鐵騎圍之諸公

亦不免矣 或傳趙延壽已死郭威言於帝曰趙匡
贊契丹所署今猶在河中宜遣使弔祭因起復移鎮
彼旣家國無歸必感恩承命從之丙申徙匡贊爲晉
昌節度使後二年延壽始卒於契丹 李昉等太平
廣記引趙延壽傳曰延壽幼習武略卽戎之暇時復
以篇什爲意嘗在北庭賦詩曰占得高原肥草地夜
深生火坼林梢南人聞者傳之

張礪

舊五代史曰張礪字夢臣祖慶父寶世爲農礪幼嗜
學有文藻 唐魏王班師礪從副招討使任園東歸

至利州會康延孝叛回據漢州園奉魏王命回軍西
討延孝時礪獻謀於園請伏精兵於後先以羸師誘
之園深以爲然延孝本驍將也任園乃儒生也延孝
聞園至又覩其羸師殊不介意及戰酣園發精兵以
擊之延孝果敗遂擒之以歸是歲四月五日至鳳翔
內官向延嗣奉莊宗命令誅延孝監軍之刼襲已聞
洛中有變故畱延孝且害任園之功故也園未決礪
謂園曰此賊構亂遂致凱旋差晚且明公血戰擒賊
安得違詔養禍是破檻放虎自貽其咎也公若不決
余自殺此賊園不得已遂誅延孝天成初明宗知其

名召爲翰林學士再丁父母憂服闋皆復入爲學士
歷禮部兵部員外郎知制誥充職未幾父之妾卒初
妾在世礪以久侍先人頗亦敬奉諸幼子亦以祖母
呼之及卒礪疑其事詢於同寮未有以對卽託故歸
於潞陽閒居三年不行其服論情制宜識者韙之
礪平生抱義憐才急於獎拔聞人之善必攘袂以稱
之見人之貧亦倒篋以濟之故死之日中朝士大夫
亦皆歎惜焉 新五代史曰德光將視朝有司給礪
三品冠服礪不肯服曰吾在上國時晉遣馮道奉冊
北朝道賁二貂冠其一宰相韓延徽冠之其一命我

冠之今其可降服邪卒冠貂蟬以朝

劉晞

續補

舊五代史曰劉晞者涿州人也父濟累爲本部諸
邑令長晞少以儒學稱於鄉里嘗爲唐將周德威從
事後陷於契丹契丹以漢職縻之天福中契丹命晞
爲燕京畱守嘗於契丹三知貢舉歷官至同平章事
兼侍中隨契丹入汴授洛京畱守會河陽軍亂晞走
許州又奔東京蕭翰遣兵援晞至洛下契丹主死晞
自洛復至東京隨蕭翰北歸遂畱鎮州漢初與麻答
同奔定州後卒於北蕃

劉珂

續補

契丹國志曰劉珂平章事晞之次子也尚世宗妹燕國公主少善射以材能稱性謹重未嘗有過爲太宗所知忿石晉負恩連年南牧戰定州時深入帝馬陷泥濘中珂下馬奉帝出身被數十創流血滿體太宗壯之遷林牙行宮都部署西北路兵馬招討使從入大梁授同知京府事尋授漢人樞密使封吳王

崔廷勳

高唐英耿崇美劉鐸附續補

舊五代史曰崔廷勳不知何許人也

通鑑注引宋白云廷勳本河內

人形貌魁偉美鬚額幼陷北庭歷仕至雲州節度使

官至侍中契丹入汴遷少帝於封禪寺遣廷勳以兵防守尋授河陽節度使甚得民情契丹北行武行德率軍趨河陽廷勳爲行德所逐乃與奚王拽刺保懷州尋以兵反攻行德行德出戰爲廷勳所敗及契丹主死遂歸鎮州漢初與麻荅同奔定州後沒於北蕃開運四年二月契丹主以通事耿崇美爲潞州節度使高唐英爲相州節度使同崔廷勳扼要害之地三月梁暉偵知相州頗積兵仗且無守備與其徒踰垣而入殺契丹數十人奪器甲數萬計遂據其城契丹主先遣高唐英率兵討之未幾契丹主至城下是

遼史拾遺補

卷五

古
遼史拾遺補

月四日攻拔之遂屠其城翼日契丹主北去命高唐英鎮之唐英閱城中遺民得男女七百人而已資治通鑑曰天福十二年夏四月契丹昭義節度使耿崇美屯澤州將攻潞州乙丑詔史弘肇將步騎萬人救之五月史弘肇攻澤州刺史翟令奇固守不下弘肇遣部將李萬超說令奇令奇乃降崔延勳耿崇美奚王拽刺合兵逼河陽張遇帥衆數千救之戰於南阪敗死武行德出戰亦敗閉城自守拽刺欲攻之廷勳曰今北軍已去得此城何用且殺一夫猶可惜況一城乎聞弘肇已得澤州乃釋河陽退保懷州弘肇

將至廷勳等擁衆北遁過衛州大掠而去契丹在河
南者相繼北去弘肇引兵與武行德合 契丹主德
光命奉國都指揮使南宮王繼弘都虞候樊暉以所
部兵戍相州彰德節度使高唐英善待之戍兵無鎧
仗唐英以鎧仗給之倚信如親戚唐英聞帝南下舉
鎮請降使者未反繼弘暉殺唐英繼弘自稱畱後遣
使告云唐英反覆詔以繼弘爲彰德畱後庚辰以暉
爲磁州刺史 舊五代史曰漢薛懷讓奏收復邢州
殺僞命節度副使知州事劉鐸時鎮州逐麻荅楊衮
收兵退鐸上表請命懷讓乘其無備遣人給鐸曰奉

詔襲契丹請置頓於郡鐸開門迎之卽爲懷讓所害
時人冤之鐸初受契丹命爲邢州都指揮使及永康
王以高奉明爲節度麻荅署爲邢州副使兼都指揮
使帝至東京奉明歸鎮州令鐸知邢州事至是遇害
列傳第八

蕭思溫

契丹國志作蕭守興

契丹國志曰守興以后父爲侍中共掌國政是時景
宗嬰疾北漢見僭叛悉平南宋侵逼屢遣蠟丸求援
而守興柱石非才兵勢少弱石嶺關南之敗喪萬餘
人後任遇彌堅年旣昏耄事多徇私更有言韻微譌

者挾摘示明朝廷以此患之畏后不敢言

李內貞

續補

欽定日下舊聞考曰按乾隆三十九年窯廠取土掘得
李內貞誌石以古墓復封識存其舊誌曰遼故銀青
榮祿大夫檢校司空行太子左衛率府率御史上柱
國隴西李公諱內貞字吉美嫺人保寧十年六月
一日薨於盧龍私第享年八十其年八月八日葬於
京東燕下鄉海王村

列傳第十一

王繼忠

玉壺清話曰眞宗爲開封尹呼通衢中鐵盤市卜一
瞽者令張者夏守贊楊崇勳左右數輩揣聽聲骨因
以爲娛或中或否獨相王繼忠瞽者駭之曰此人可
訝半生食漢祿半生食胡祿眞宗笑而遣去繼忠後
爲觀察使高陽總管咸平六年契丹寇望都與虜酣
戰至乙夜戎騎合圍數十重徐戰徐行旋徬西山而
遁至白城陷虜上聞之甚嗟悼皆謂卽沒景德初戎
人乞和繼忠與撰奏章而勸諷誘掖大有力焉朝廷
方知其存後每歲遣使眞宗手封御帶藥茗以賜焉
繼忠服漢章南望天闕稱未死臣哭拜不起問聖體

起居不避虜嫌以其姿儀雄美虜以女妻之僞封吳王改姓耶律卒於虜人謂陷蕃王氏云 宋元通鑑曰繼忠見契丹主於炭山蕭太后知繼忠才賢授戶部使繼忠固言南北通好之利契丹主然

列傳第十二

耶律隆運

契丹國志曰隆運自爲相以來結懽宋朝歲時修睦無少間隙帖服中外靡有邪謀 帝以隆運勲大恩數優渥秦齊二王每日一問起居至隆運所居帳二里外已去蓋下車徒步而進暨其回也列揖於帳外

隆運坐而受之帝或至其帳亦五十餘步下車隆運
出迎盡禮帝亦先爲之揖及入內同家人禮飲膳服
食盡一時水陸珍品諸國爭爲奇怪入貢動駭耳目
隆運疾帝與太后禱告山川召蕃漢名醫診視朝夕
不離左右

耶律題子

圖繪寶鑑補遺曰耶律題子字勝隱官至西南招討
都監嘗從北院樞密使侵宋宋將有面傷而仆者題
子繪其狀以示宋咸嗟神妙

耶律裒履

圖繪寶鑑補遺曰耶律褒履字德鄰官至太子太師
工於畫

列傳第十五

高勳

張齊賢洛陽摺紳舊聞記曰高勳陷北契丹用爲幽
州節度使母在京洛陽福善里太祖常厚賜慰安之
高後欲歸不知其終 舊五代史曰湯陰縣界有一
岡土人謂之愁死岡德光憩於其上謂宣徽使高勳
云云勳退而謂人曰其語偷殆將死

王晝

續補

拙軒集先君行狀曰六世祖晝宋虜國公旦之從弟也爲人勇果善騎射咸平初以靈夏之役累功遷供備庫使景德中命率所領戍雄州以禦契丹是時鳴鏑滿郊每戰輒勝一日輕兵追北陰靈迷所向誤墮溻津爲遼人邏得之羈縻於景州南部落子孫家焉

列傳第十六

劉六符

契丹國志曰劉六符年十五究通經史兼綜百家之言長而喜功名慷慨有大志歷事聖宗朝爲著作郎中允又爲詹事國子祭酒 孔平仲談苑曰張安道

言嘗使契丹方燕戎主在廷下打球安道見其纒紉諸物鮮明有異知其爲戎主也不敢顯言但再三咨其藝之精耳接伴劉六符意覺安道知之色甚忤云

後山談叢曰契丹劉六符貴川事建議割地及館客怒謂富鄭公曰公爲主言諸臣利於用兵不爲國計六符豈欲間兩國耶公曰君寧出此顧餘人爲之耳如宋不過弼數輩不欲戰爾其以戰說者何限六符旣喜且懼然終以此得罪也 顧炎武卅知錄曰遼史劉六符傳似本其家誌狀與其祖景同爲一傳而有重文

列傳第十七

蕭孝穆

契丹國志曰孝穆討渤海大酋宿石貞柵於金閣山上險峻不可攻孝穆爲宣揚恩意開其自新凡所招降七萬餘戶而還以功授東遼王聖宗疾亟急召赴闕聖宗崩以輔立功封晉王

列傳第十九

馬保忠

拾遺補

契丹國志曰興宗傳賞濫行除授無法樞密使馬保忠本漢人嘗從容進諫曰罰當罪賞當功有國之令

典也積薪之言汲黯歎之斜封之濫至唐而極國家
起自朔北奄有幽燕量才授官人始稱職今臣下參
養承平無勲可陟宜且序進之帝拂然怒

耶律防

續補

宋元通鑑曰仁宗以文彥博富弼同平章事會契丹
使者耶律防至王德用與射於玉津園防曰天子以
公典樞密而用富公爲相皆得人矣

楊益戒

續補

宋史沈括傳曰使至契丹庭契丹相楊益戒來就議
括得地訟之籍數十預使吏士誦之益戒有所問則

顧吏舉以答

列傳第三十二

虞仲文 續補

續夷堅志曰虞令公仲文字質夫四歲賦雪花詩曰
瓊英與玉蘂片片落前池問著花來處東風也不知
仕爲遼相歸朝授平章政事濮國公云 夏文彥圖
繪寶鑑曰虞仲文善畫人馬墨竹學文湖州

復古案虞仲文金史有傳因其仕金日淺故補錄
於此

列傳第三十三文學上

李澣

宋史李澣傳曰周廣順二年澣因定州孫方諫密表
言契丹衰微之勢周祖嘉焉遣諜者田重霸齎詔慰
撫仍命澣通信澣復表述契丹主幼弱多寵奸擊鞠
大臣離貳若出師討伐因與通好乃其時也屬中原
多事不能用其言澣在契丹嘗逃歸爲其所獲防護
彌謹應歷十二年六月卒 蘇易簡續翰林志曰澣
以詞藻特麗俊秀不羣後以石晉不造陷於北廷亦
神鋒太峻之過也 王明清揮塵後錄曰五代李澣
與澣俱負才望澣仕石晉爲內相耶律德光犯京師

俘之以歸後仕契丹通顯有小集十卷

劉涇 續補

宋庠楊文公譚苑曰契丹通事舍人劉涇奉使路中有野韭可食味絕佳作詩云野韭寒猶長沙泉晚更清

復古案遼史聖宗紀開泰二年戶部侍郎劉涇加工部尚書百官志劉涇爲禮部尚書

王鼎

王鼎焚椒錄敘曰鼎於咸太之際方侍禁近會有懿德皇后之變一時南北面官悉以異說赴權互爲證

足遂使懿德蒙被淫醜不可湔浣嗟嗟大墨蔽天白日不照其能尸說以相白乎鼎婦乳媼之女蒙哥爲耶律乙辛寵婢知其奸構最詳而蕭司徒復爲鼎道其始末更有加於姬者因相與執手歎其冤誣至爲涕淫淫下也觀變以來忽復數載頃以待罪可敦城去鄉數千里視日如歲觸景興懷舊感來集乃直書其事用竢後之良史若夫少海翻波變爲險陸則有司徒公之實錄在大安五年春三月前觀書殿學士臣王鼎謹序

虎斯

殷仲春焚椒錄國語解曰虎斯有力也

武里塞

焚椒錄國語解曰武里塞皇后也

列傳第三十四文學下

馬賢良

續補

遼詩話曰宣和四年十月郭藥師等以常勝軍入燕
城時有燕人馬賢良者獻詩曰破敵將軍曉入燕
城和氣接堯天汕然鑿鑿三千士雨洗兵戈二百年
按賢良顛末不詳僅見此詩

列傳第四十二逆臣上

重元

契丹國志作宗元

契丹國志曰宗元性極殘忍每出一囚犯死罪者命衆集射斬而轡之流血滿前飲啖自若意志不臣每伺時毀洪基嗣立奉長樂之命以爲皇叔後因遊獵伺間弑帝左右遮救得免

列傳第四十三逆臣中

蕭翰

父阿巴附

舊五代史曰蕭翰者契丹諸部之長也父曰阿巴劉仁恭鎮幽州阿巴曾引衆寇平州仁恭遣驍將劉鴈郎與其子守光率五百騎先守其州阿巴不知爲郡

人所給因赴牛酒之會爲守光所擒契丹請贖之仁
恭許其請尋歸阿巴妹爲阿保機妻則契丹主德光
之母也翰有妹亦嫁於德光故國人謂翰爲國舅契
丹入東京以翰爲宣武軍節度使契丹比無姓氏翰
將有節度之命乃以蕭爲姓翰爲名自是翰之一族
皆姓蕭契丹主北去留翰以鎮河南時漢高祖已建
號於太原翰懼將北歸慮京師無主則衆皆爲亂乃
遣蕃騎至洛京迎唐明宗幼子許王從益知南朝軍
國事從益至翰率蕃將拜於殿上翌日翰乃輦其寶
貨鞍轡而北漢人以許王旣立不復爲亂果中其狡

計翰行至鎮州遇張礪翰以舊事致忿就第數其失而鎖之翰歸至本國爲永康王元欲所鎖尋卒於本土契丹國志曰翰最殘忍工騎射時太宗與張敬達交鋒翰等自東北起衝唐兵爲一唐兵大敗步兵死者萬人

二國外紀第四十五

高麗

續通典曰晉天福中有西域僧襍囉來朝善火卜俄辭高祖請遊高麗王建甚禮之時契丹併渤海之地有年矣建從容謂襍囉曰渤海本吾親戚之國其王

爲契丹所虜吾欲爲朝廷攻而取之且欲平其舊怨
師回爲言於天子當定期兩襲之襍囉還具奏高祖
不報出帝與契丹交兵襍囉復奏之帝遣郭仁遇飛
詔諭建深攻其地以牽脅之會建已卒武知國事與
其父之大臣不叶自相魚肉內難稍平兵威未振且
夷人怯懦襍囉之言皆建虛誕耳 宋元通鑑曰太
宗太平興國五年六月高麗遣使來貢雍熙二年九
月遣使如高麗時議伐契丹以高麗與之接壤數爲
所侵命韓國華齋詔諭令發兵西會高麗遷延未卽
奉詔國華屢檄督催之得報發兵乃還 眞宗大中

祥符七年十月高麗來貢自高麗王誦立遣使入朝
爲契丹所阻不通中國者累年至是詢復遣其工部
侍郎尹證古入貢詔登州置館於海次以待之徐
兢宣和奉使高麗圖經曰天禧中契丹復破高麗殺
戮其民幾盡王詢至棄國而逃於蛤窟契丹畱城中
八月會西北山萬松皆作人聲始駭懼引去文昌
雜錄曰熙寧二年朝廷始命兩浙福建等路轉運使
招接高麗入貢時舟人傳旋至彼國述朝廷之意王
徽喜甚次年二月十五日然燈如中華上元旋適在
彼見徽賦感天朝招接擬侍中華然燈夜述懷詩云

遼史拾遺補

卷五

三

遼史拾遺補

宿罪應深近契丹歷年徒貢事多般忽蒙舜日龍綸
召便侍堯天佛會觀燈焰似蓮裝闕陷月華似水洩
雲寒夷身幸入華胥境甚惜今宵漏滴殘福建路轉
運使張徽上其事云

復吉案拾遺采石林詩話所載與此不同故補錄
以備參考

嘉祐雜志曰高麗新羅合爲一國其主王輝用契丹
正朔 宋元通鑑曰徽宗崇寧二年九月高麗與女
眞通好女眞雖舊屬高麗不相通者久矣會高麗醫
者至女眞還言於高麗王曰女眞居黑水者部族日

強兵益精悍王乃通使於女真自是來往不阻三年
三月高麗侵女真女真敗之高麗旣與女真通好會
烏雅束遣石適歡以兵徇曷懶甸之地下其七城高
麗恐不利於已使人請議事石適歡使孟魯往而曷
懶甸亦使二詳穩如高麗高麗執二詳穩而拒孟魯
不納於是五水之民皆附高麗執女真團練使十四
人進攻女真石適歡連破之追入闕登水逐其殘衆
踰境高麗王懼遣還所俘請和由是使好復通 張
端義貴耳集曰宣和元年高麗遣使一旦忽上奏以
其主病求醫帝擇二良醫往歲餘方歸二醫奏曰王

館醫甚勤謂曰高麗小國世受國恩不敢忘聞天子
用兵遼實兄弟國苟存之猶足爲中國捍邊女真乃
虎狼不可交也願二醫告諸天子早爲之備 宣和
奉使高麗圖經曰巨鐘在普濟寺形大而聲不揚上
有螭紐中有雙飛仙刻銘曰甲戌年鑄用白銅一萬
五千斤麗人曰昔者置之重樓聲聞契丹單于惡之
今移於此

西夏

東都事略曰宣和中夏人知中國有事北邊遂與遼
國書約夾攻中國天祚不聽金人旣滅遼夏人乃與

粘罕約犯塞 宋元通鑑曰宣和五年五月金遣使

如夏時幹離不趨天德軍聞夏迎護遼主遼主已渡

河乃遣書於夏使執遼主且許割地六年正月夏遣

把里公亮奉誓表請以事遼之禮稱藩於金且受割

賜之地粘沒喝承制割下寨以北陰山以南乙室邪

利部吐祿濼西之地與之自是兩國信使不絕 元

朝祕史曰狗兒年宋理宗寶慶二年丙戌太祖征唐兀即西夏太

祖至靈州城唐兀主不兒罕宋史作呢奉金佛器幣男女

馱馬來降太祖殺不兒罕盡滅其族 錢大昕三史

藝文志曰幹道沖周易卜筮斷字宗聖西幹道沖論

語小義二十卷

國語解第四十六

耶律氏 蕭氏

周春遼姓譜曰二姓之起也記載前後不同當日羣臣分修總裁者不能詳定以歸於一遂爾矛盾若此合以折中可見也 迭烈部長雅里一作涅里分三

耶律爲七一曰遙輦二曰大賀三曰世里二者之名尚已蓋本當時部族之號至阿保機始以爲姓後又總稱耶律也 太祖紀迭烈部霞濶益石烈耶律彌里人歐史附錄以所居橫帳地爲姓曰世里譯者謂

之耶律北俗多卽部族爲地名亦卽以爲姓譯者不
得其詳誤分爲二 契丹世系本不足信大約由鮮
卑而宇文由宇文而契丹隋唐之際大賀氏遙輦爲
大賀之更號世里卽遙輦之別支三者同原非蕭氏
比也 太祖慕漢高以后族比蕭相國故命爲蕭氏
然宣簡以上已有之始其後之追稱歟乙室部之先
曰撒本與兄益古分營而領曰乙室曰拔里已所謂
二審密是也太祖后述律氏回鶻人糯思之後糯思
一名胡母里西夏近回鶻元時尚有此姓 旣改蕭氏二族從之實
非同系定著爲二 太祖命小漢爲宣武節度使使

李松製姓名曰蕭翰以賜之此宋人之臆度也

即小漢

翰宋人取其音以呼之故有互異其先從隋蕭后入突厥及后還

遼爲述律氏遼亡爲石抹氏此元人之附會也 契

丹字書爲移刺漢字書爲耶律契丹字書爲石抹漢

字書爲蕭國語解云無考就金人移刺爲劉石抹爲

蕭觀之知本契丹語而金人沿之也太祖慕漢命耶

律族姓劉氏后族姓蕭氏則耶律特契丹語改爲劉

字述律本回鶻姓改爲蕭氏後人附會爲一耳迭烈

一作移刺正所謂因部族爲姓也葉志曰以所居之

地名世里著姓世里者上京東百里地名也今名世

星沒里以漢語譯之謂之耶律氏與歐史同

夷離畢

姜宸英湛園札記曰遼史國語解引宋刁約詩押宴
夷離畢亦是執政重臣余讀金史禮儀志凡行省來
宴回宴之押宴官皆從行省定差就借以文武高爵
長官之職以爲轉銜之光想此卽遼遺制雖在朝廷
亦借銜也

射鬼箭

汪師韓韓門綴學曰遼有射鬼箭之刑按他書亦稱
攢矢叢矢而鬼箭之名乃遼所獨也

葉格戲

高士奇天祿識餘曰唐同昌公主會韋氏族於廣化里韋氏諸家好爲葉子戲南唐李後主妃周氏編金葉子格此戲自唐咸通以來有之卽今之紙牌其首選加朱采豈古六赤編金之遺意耶遼史稱爲葉格見第三卷

魚宴

周麟之海陵外集曰牛魚出混同江其大如牛或云可與牛同價故名方以智通雅曰牛魚北方之鮓類也契丹主達魯河釣牛魚以其得否爲歲占

梢拙犀

續松漠紀聞曰契丹重骨咄犀犀不大萬株犀無一
不曾作帶紋如象牙帶黃色止是作刀把已爲無價
天祚以此作兔鶻

中國謂之腰條皮

插垂頭者

鷹背狗

拾遺補

雕窠生獵犬

又見拾遺游幸表咸雍三年獵於赤山條下

熊太古冀越集記曰胎生卵生分羽毛二族余經上
都過雕窠站站吏指站後山上一穴云往年雕窠其
中生三卵一爲雕一爲犬一爲蛇心竊疑之後於脫
脫丞相家見一犬坐客咸指此犬爲雕窠所生則知
向者所聞不爲異也

遼史拾遺補

卷五

三
振綺堂校刊

早金花

拾遺補

查慎行人海記曰早金蓮花瓣如池蓮較小色如眞金暴乾可致遠扈從出古北口塞外山多有之開花
在五六月間入秋莖株俱萎矣

貌狸

拾遺補

澠水燕談錄曰自公相以下不可得而嘗常以羊乳飼之頃年北使嘗攜至烹以進御今朝臣奉使其國者皆得食之然中國人亦不嗜其味也

復吉按此條
厲氏所引未

全故備
錄之

劉績霏雪錄曰北方黃鼠穴處各有配人掘其穴者

見其中作小土窖若牀榻之狀則牝牡所居之處也
秋時蓄黍菽及草木之實以御冬各爲小窖別而貯
之天氣晴和時出坐穴口見人則拱兩腋如揖狀卽
竄入穴韓孟聯句所謂禮鼠拱而立者是也惟畏地
猴形極小人馴養之縱入其穴則銜黃鼠喙曳而出
味極肥美北朝恒爲玉食之獻置官守其處人不得
擅取也

紀昀姑妄聽之曰遼重毗離亦曰毗令邦卽宣化黃
鼠明人尚重之今不重矣

匹裂

刁約詩已見拾遺補國語解龜狸條下

阮葵生茶餘客話曰匹裂卽今之沓杯俗名套杯外
大內小古人不過五六古今詩話刁約使契丹詩云
餞行三匹裂

鎮庫萬年不毀墨

陽岩鎮造墨已見拾遺補國語解

陸友墨史曰契丹二品陸子履奉使契丹日得墨銘
曰陽岩鎮造者其國精品也滕子濟亦有墨一大笏
爲龍鳳之文面曰鎮庫萬年不毀

通事

續補

胡三省通鑑注曰契丹置通事以主中國人以知華
俗通華言者爲之宋白云契丹主腹心能華言者曰

曰通事謂其洞達庶務

奚車

續補

通鑑注曰沈括言奚人業伐山種陸種斲車契丹之車皆資於奚按輜車之制如中國後廣前殺而無股材儉易收不能任重而利於行山長轂廣輪輪之牙其厚不能四寸而軫之材不能五寸其乘車駕之以

■

馳上施旒惟富者加氈憶文繡之飾

鐵鷁軍

續補

通鑑注曰契丹謂精騎爲鐵鷁謂其身披鐵甲而馳突輕疾如鷁之搏鳥雀也

乳粥

續補

朱或可談曰先公至遼日供乳粥一椀甚珍但沃以生油不可入口諭之使去油不聽因給令以他器貯油使自酌用之乃許自後遂得淡粥又先公使遼遼人相見其俗先點湯後點茶至飲亦先水飲然後品味疊進但欲與中國相反本無義理

燕箸

續補

談苑曰北中大寒七箸必於湯中蘸之方得入口不爾與肉相沾不肯脫石鑑奉使不曾蘸箸以取榛子沾臂如烙皮脫血流淋漓衣服上

吹葉成曲

續補

張舜民使遼錄曰胡人吹葉成曲以蕃歌相和音韻

甚和

飲宿

續補

武珪燕北雜記曰契丹飲宿不逐水草

膠弓

續補

燕北雜記曰燕北膠弓堅勁不易折

啞揖

續補

文惟簡北庭事實曰漢兒士大夫見上位者年及久
闊交見則進退周旋三出頭五折腰相揖而不作聲

名曰啞揖不如是者爲山野之人不知禮法衆咸嗤笑契丹之人又手胸前亦皆不作聲是謂相揖

紫濛

續補

宋稗類鈔曰宋人送使臣使契丹詩以青瑣對紫濛多不知其出處按晉書慕容氏自云有熊氏之裔邑於紫濛之野蓋以慕容比遼是時南北方結好故雖送別紀行之語略不涉譏刺之言此用紫濛字亦隱而妙方虛谷以爲契丹館名妄猜之言耳

渾脫

續補

葉子奇草本子曰北人殺小牛自脊上開一孔逐旋

取去內頭骨肉外皮皆完揉軟用以盛乳酪酒湏謂之渾脫

哨鹿

續補

人海記曰哨鹿之說遼史已有之但未詳其法今特志之每歲於白露後三日獵者衣鹿皮戴鹿頭天未明潛伏草中吹木筒作聲牡鹿聞之以爲求其偶也遂踴躍至至則利鏃加焉無得脫者

燒飯

續補

契丹國志曰旣死則設大穹廬鑄金爲象朔望節辰忌日輒致祭築臺高丈餘以盆焚食謂之燒飯

堂後官

續補

李心傳朝野雜記曰堂後官謂三省諸房都錄事也
補職一年改宣教郎 劉祁歸潛志曰省吏前朝止
用胥吏號堂後官

金牌銀牌郎君

續補

洪邁容齋三筆曰金國每遣使出外貴者佩金牌次
者佩銀牌俗呼爲金牌銀牌郎君北人以爲契丹時
如此

海東青

續補

姜夔白石道人集契丹歌

原註都下聞蕭總管
自說其風土如此

曰平

沙軟草天鵝肥契丹千騎曉打圍皂旗低昂圍漸急
驚作羊角凌空飛海東健鶻健如許韝上風生看一
舉萬里追奔未可知劃見紛紛落毛羽 陳元龍格
致鏡原曰北山產海青鳥小而捷能擒天鵝然羣燕
撲之則墜亦謂之海東青爪白者尤異五國城東出
頭鵝 續補

草木子曰海東青能得頭鵝者元朝官裏賞鈔五十
錠 楊弼山居新語曰頭鵝卽天鵝也

爪拉 續補

通雅曰中人帽曰爪拉徐文長曰遼主名查拉或服

是帽轉爲爪拉近有高麗王帽京師呼爲爪拉

白貂

續補

王鳴盛十七史商榷曰五代史附錄契丹耶律德光脫白貂裘以衣晉高祖白貂俗呼銀鼠

操刺

續補

十七史商榷曰五代史漢高祖紀耶律德光指知遠曰此都軍甚操刺今人以雄猛爲插刺操刺當卽此意

黃羊

續補

遼詩話曰少陵詩黃羊飫不羶注云大觀四年郭隨

使遼舉此詩以問遼使時立愛立愛云黃羊野物可
獵取食之不羶

契丹膠

續補

王士禎香祖筆記曰東坡作墨以高麗煖契丹膠爲
之

琥珀杯

續補

無名氏名山祕錄曰遼蕭后有琥珀杯二枚形如半
桃核合之無縫客酒半升許每朝會則酌酒以賜有
功大臣當時惟耶律斜軫得賜數次國人以爲榮

毒矢斃鹿

續補

談苑曰吳長文使遼遼人打圍無所獲忽得一鹿請
南使觀之須臾剝剔了已昏夜矣數兵煮其骨食之
皆嘔血吳左丞畱雙腎於銀器中云此最補煖且欲
薦之翌日銀器內皆黑色乃毒矢所斃爾不敢洩埋
之而去

遼史拾遺補卷五